

**Illoqarfinni annerusuni arfineq marluusuni ungasissumiit kiassarnikkut, innaallagissamillu kiassarnikkut ullumikkuminngarnit suli annerusumik atorluaanerulernissarput siunertaralugu, Naalackersuisut suliniuteqaqqullugit peqquneqarnissaannik Inatsisartut aaliangiiffigisassaatur siunnersuut. Illoqarfiit pineqartut tassaapput Ilulissat, Qasigiannugit, Aasiaat, Sisimiut, Maniitsoq, Nuuk aamma Qaqortoq.**

(Inatsisartuni ilaasortaq Peter Olsen, Inuit Ataqatigiit)

**Ulloq 1. januar 2018-imut qitiusumik kiassaateqarfinnut kissarsuuteqarfinnullu il.il. Namminersorlutik Oqartussanit toqqaannangitsumik toqqaannartumilluunniit pigineqartunut tamanut piginnittuunerup, akisussaanerup, ingerlatsinerup aserfallatsaaliinerullu il.il. Nukissiorfinni ataatsimut katersorneqarnissaat pillugu Naalackersuisut peqquneqarnissaannut Inatsisartut aalajangiiffigisassaattut siunnersuut.**

(Inatsisartuni ilaasortat, Kalistat Lund, Anders Olsen, Vivian Motzfeldt, Bendt B. Kristiansen aamma Mala Høy Kúko)

#### **Akissuteqaat**

(Inuussutissarsiornermut, Suliffeqarnermut, Niuernermit Nukissiuuteqarnermullu Naalackersuisoq)

#### **Aappassaaneerinninneq**

Aallarniutigalugu Naalackersuisut Sanaartornermit Ataatsimiititaliaq qutsavigissavaat isumaliutissiissutaannut peqqissaartumik suliaasumut.

Soorlu aamma siullermeerinninnermi erseqqissarneqareersutut Naalackersuisut siunnersuutit arlariit taakkua iluarisimaarlugit tiguaat.

Siunnersuut UPA 2017/47 – Naalackersuisut peqquneqarnissaannik, illoqarfinni annerni arfineq marlunni ungasissumiit kiassanikkut aamma innaallagissamik kiassanikkut periarfissat ullumikkornit naammassisaqarfiunerusumik iluaqutigineqarnissaat Naalackersuisut tamakkiisumik tapersorsorpaat. Ungasissumiit kiassarnermik aamma innaallagissamik kiassarnermik iluaquteqarnerit qitiusumik inissisimassapput suliassaqarfimmi tassani nukissiuuteqarnikkut pilersaarutaalersussami.

Siunnersuut UPA 2017/183, Naalakkersuisut peqquneqarnissaat piginnittuunerup, akissusaanerup, ingerlatsinerup aserfallatsaaliinerup il.il. Nukissiorfinni 1. januar 2018 katersorneqarnissaannut, pisariunerungaatsiarpoq. Ataatsimoortumik paasissutissanik kiassaateqarfiit qitiusumillu kissarsuuteqarfiit qanoq aserfallassimatiginerinut tunngatillugu peqanngilaq. Assersuutigalugu 2007-imi Kangerlussuarimi kiassaateqarfiit qanoq aserfallassimatigissusiat nalilersuivigineqarpoq. Tamatumalu kingorna aningaasalersuinissamik pisariaqartitsineq nalilersorneqarmat, Nukissiorfiit eqikkaapput Kangerlussuarimi aningaasaliissuteqarnissamut pisariaqartitsineq 2009-mi akiusut naapertorlugit 50 mio. kr.-t missaanniissasoq.

Taamaattumik aningaasartuutunik Namminersorlutik Oqartussat toqqaannartumik toqqaannanngitsumillu kiassaateqarfiutaasa aamma qitiusumik kissarsuuteqarfiutaasa il.il. Nukissiorfinnut tunniunneqarnissaat annertuunik kinguneqassasoq naatsorsuutigisariaqassaaq. Aningaasartuutaasullu atuisunut akiligassanngortinniaraluaraanniluunniit, nukissiuutunik atuinnermut akiliutit annertunerulersinnerisigut, aningaasartuutaasussat siullermik aningaasanut inatsit aqputtigalugu akilerneqaqqaartussaapput. Tamannalu aningaasalersortariaqalissaaq suliniutit allat aningaasanut inatsimmiit peerneqarnerisigut. Taamaattumik siullermik pisariaqassaaq siunnersuummi ataatsimoortumik aningaasaqarnikkut kingunerisassaasa nalilersorneqaqqaarnissaat, qularnaarumallugu aningaasalersuinissap inissinneqarsimanissaa.

Taamaattumillu Naalakkersuisut UPA 2017/183-imut ataani allannguutissamik siunnersuuteqassapput:

**”Namminersorlutik Oqartussat toqqaannanngitsumik aamma toqqaannartumik kiassaateqarfiit qitiusumillu kissarsuuteqarfiit il.il pigisaat. tamaasa katersorneqarnissaat siunertaralugu, siunnerfigalugu piginnittuunerup, akissusaasuunerup, ingerlatsinerup aamma aserfallatsaaliinerup il.il. Nukissiorfinni katersorneqarnissaat pillugu Naalakkersuisut UKA 2017-imi nalunaarusiamik saqqummiussinissamut peqquneqarnissaannut Inatsisartut aalajangiiffigisassaattut siunnersuut.”**

Nalunaarusiaq aningaasaqarnikkut kingunerisassat pillugit paasissutissiinnermik imaqassaaq, tamatumani aamma aningaasanut inatsimmi aningaasartuutitut sunniutaasussat pillugit, kiisalu aningaasartuutaasussanut matussutissatut allatigut sipaaruteqarnikkut siunnersuuteqartoqassalluni.

Naalackersuisut taamatut oqaaseqarlutik siunnersuutit Inatsisartunut suliassanngortippaat, inassutigalugulu imm. 47 akuersissutigineqassasoq, kiisalu imm. 183-imut allannguutissatut siunnersuut aamma akuersissutigineqassasoq.